

## **Moga Belanjawan 2024 bawa ekonomi Malaysia ke tahap lebih baik – Anwar**

Oleh JUANI MUNIR ABU BAKAR

13 Oktober 2023, 12:04 pm

PETALING JAYA: Pembentangan Belanjawan 2024 Malaysia Madani diharapkan dapat membawa ekonomi negara ke tahap lebih baik khususnya dalam menghadapi cabaran global masa kini.

Perdana Menteri, Datuk Seri Anwar Ibrahim berkata, belanjawan itu juga diyakini mampu menyokong agenda pembangunan dan kebajikan negara ini.

"Saya akan membentangkan Belanjawan 2024 Malaysia Madani di Dewan Rakyat pada 4.00 petang ini.

"Moga intipati pembentangan ini dapat membimbing ekonomi kita ke tahap lebih baik dalam berdepan tentangan global masa kini selain menyokong agenda pembangunan dan kebajikan negara, Insya-Allah," katanya dalam Facebook beliau hari ini.

Perdana Menteri merangkap Menteri Kewangan dijangka membentangkan belanjawan buat kali kedua selepas pembentukan Kerajaan Perpaduan sejak Pilihan Raya Umum Ke-15 (PRU15) pada November 2022.

Ekoran krisis bekalan beras yang melanda dunia, Belanjawan 2024 dijangka memfokuskan soal sara hidup, agihan subsidi bersasar dan pembangunan jaringan sosial yang merangkumi soal kesihatan dan pendidikan. – UTUSAN